

*Oitava.-Medios materiais.*

Os distintos centros de atención primaria e especializada do Servizo Galego de Saúde en que se impartan as actividades incluídas neste plan deberanlle proporcionar á Fegas as aulas, co equipamento de medios audiovisuais axeitados para a actividade de que se trate.

Igualmente, correrá a cargo dos centros o aseguramento e a responsabilidade civil derivada da realización neles dos distintos cursos incluídos neste plan.

*Novena.-Anulación de reserva.*

Se o aspirante definitivamente seleccionado para a realización dunha actividade docente decide non asistir a ela, deberá comunicarlle a súa renuncia, vía fax ou correo electrónico, á Fegas ou ao delegado da Fegas na institución sanitaria onde terá lugar o desenvolvemento do curso con, como mínimo, catro días hábiles de antelación á súa data de inicio.

De non facelo así, e salvo motivo xustificado, non será admitido en ningunha outra actividade formativa nos próximos 12 meses.

*Décima.-Financiamento.*

En razón dos fondos con que se financian estas accións formativas, a súa realización efectiva está condicionada á aprobación definitiva do acordo e a transferencia de fondos por parte do Instituto Nacional de Administración Pública.

Santiago de Compostela, 3 de xaneiro de 2008.

Antonio José Fernández Paniagua Director xeral da División de Recursos Humanos e Desenvolvemento Profesional do Servizo Galego de Saúde	María Berta Rivera Castiñeira Directora da Escola Galega de Administración Sanitaria
---	--

## CONSELLERÍA DE PESCA E ASUNTOS MARÍTIMOS

*Orde do 11 de xaneiro de 2008 pola que se establece o prazo para presentación de solicitudes de subvencións a proxectos colectivos de xestión pesqueira para o exercicio 2008 e se particulariza o seu importe global máximo, tramitada como expediente anticipado de gasto.*

Mediante orde da Consellería de Pesca e Asuntos Marítimos do 10 de agosto de 2007 (DOG nº 169, do 31 de agosto) aprobáronse as bases reguladoras para a concesión, en réxime de concorrencia competitiva, de subvencións a proxectos colectivos de xestión pesqueira, e estableceuse a súa convocatoria para o ano 2007. Nos seus artigos 3º e 11º dispón que anualmente se publicarán os importes máximos de conce-

sión de axudas na correspondente anualidade e nas sucesivas (para o caso de investimentos plurianuais), así como os períodos de presentación de solicitudes para cada unha das anualidades 2008 a 2013. Os importes consignados en cada convocatoria, así como as aplicacións ás que se imputen, poderán ser ampliados en función das disponibilidades orzamentarias sen que iso dea lugar á apertura de novo prazo de presentación de solicitudes, salvo indicación expresa en contrario na orde que se publique para o efecto.

O número máximo de anualidades vén establecido no artigo 6, que dispón que se poderán presentar proxectos de carácter plurianual, sen que a súa duración poida exceder de catro exercicios orzamentarios. A subvención que neste caso se conceda aterase aos límites establecidos para os compromisos de gasto plurianuais no artigo 58 do texto refundido da Lei de réxime financeiro e orzamentario de Galicia.

Aprobado polo Consello da Xunta do día 18 de outubro de 2007 o proxecto de Lei de orzamentos para o 2008, prevese a existencia de crédito axeitado a esta finalidade polo que procede establecer o importe global máximo para a concesión destas axudas no exercicio de 2008.

Por todo o exposto, esta consellería,

**DISPÓN:****Artigo 1º**

O prazo de presentación de solicitudes de axuda ao abeiro da Orde do 10 de agosto de 2007, pola que se aproban as bases reguladoras para a concesión, en réxime de concorrencia competitiva, de subvencións a proxectos colectivos de xestión pesqueira, e se establece a súa convocatoria (DOG nº 169, do 31 de agosto), para o exercicio orzamentario 2008, será dun mes a partir do día seguinte ao da publicación desta orde.

**Artigo 2º**

A solicitude deberá presentarse no modelo que figura como anexo III á Orde do 10 de agosto de 2007. Igualmente deberán cubrirse nos modelos publicados como anexos IV, V e VI da citada orde o orzamento e as declaracións responsables que deben achegarse xunto coa solicitude. Todos estes modelos estarán dispoñibles en formato electrónico na epígrafe servizos de administración electrónica da páxina web <http://webpesca.xunta.es>.

**Artigo 3º**

De conformidade co disposto no artigo 7º das bases reguladoras, consideraranse subvencionables os gastos do punto primeiro do dito artigo, realizados entre a data de presentación da solicitude e o 31 de decembro de 2013. No caso de investimentos consistentes en instalacións fixas ou que precisen de realización de obras, será requisito imprescindible para a concesión da axuda que os servizos da consellería certifiquen o non inicio dos investimentos con anterioridade ao comezo da execución.

## Artigo 4º

As axudas outorgaranse con cargo á aplicación orzamentaria 14.02.723A.770.1, código de proxecto 200700564 que figura dotada no proxecto de Lei de orzamentos da Comunidade Autónoma de Galicia para 2008. Os importes máximos das subvencións que se concedan no 2008 ascenderán a 10.800.000 euros, e distribuiranse nas seguintes anualidades:

-Anualidade 2008: 4.500.000 €.

-Anualidade 2009: 2.450.000 €.

-Anualidade 2010: 2.100.000 €.

-Anualidade 2011: 1.750.000 €.

De conformidade co disposto no artigo 3 das bases reguladoras, estes importes así como as aplicacións ás que se imputen, poderán ser ampliados en función das dispoñibilidades orzamentarias sen que iso dea lugar á apertura de novo prazo de presentación de solicitudes, salvo indicación expresa en contrario na orde que se publique para o efecto.

En todo caso, e de conformidade co disposto na Orde do 11 de febreiro de 1998 (DOG nº 33, do 19 de febreiro), sobre tramitación anticipada de expedientes de gasto, o gasto que se proxecta queda condicionado á existencia de crédito axeitado e suficiente nos orzamentos xerais da Comunidade Autónoma de Galicia para 2008.

*Disposición adicional*

Única.-Modifícase o artigo 25 da Orde do 10 de agosto de 2007 pola que se aproban as bases reguladoras para a concesión, en réxime de concorrencia competitiva, de subvencións a proxectos colectivos de xestión pesqueira, e se establece a súa convocatoria (DOG nº 169, do 31 de agosto) que queda redactado como segue:

«Artigo 25º.-*Reintegro*.

Procederá o reintegro, total ou parcial, da subvención concedida e dos xuros de mora que se teña dereito a percibir desde o momento do seu pagamento ata a data en que se acorde a procedencia do reintegro nos supostos sinalados nos artigos 33 e 34 da Lei 9/2007, do 13 de xuño, de subvencións de Galicia».

*Disposición derradeira*

Única.-Esta orde producirá efectos desde o día seguinte ao da súa publicación no *Diario Oficial de Galicia*.

Santiago de Compostela, 11 de xaneiro de 2008.

Carmen Gallego Calvar  
Conselleira de Pesca e Asuntos Marítimos

## CONSELLERÍA DE MEDIO AMBIENTE E DESENVOLVEMENTO SOSTIBLE

*Orde do 21 de decembro de 2007 pola que se aplica, provisionalmente, o réxime de zona de especial protección dos valores naturais ao espazo natural Miño-Neira.*

O espazo natural Miño-Neira, pertencente aos municipios de Guntín, Lugo, O Corgo e O Páramo, esténdese desde o lugar denominado Caneiro de Santalla, augas abaixo da cidade de Lugo, ata a localidade de Leboriz, incluíndo tamén o río Neira, desde a súa confluencia co Miño ata o lugar coñecido como A Ponte de Neira, cunha superficie de 842 ha. Desde o 7 de novembro de 2002 forma parte da Rede Mundial de Reservas da Biosfera ao estar incluído en Terras do Miño, territorio de 363.669 hectáreas e integrado por vinte e seis concellos situados na bacía alta do río Miño, ao que a Unesco outorgou a máxima catalogación ambiental. Este galardón supón o recoñecemento pleno á convivencia sustentable, a unha forma de vida que, durante séculos, soubo compatibilizar o desenvolvemento de actividades produtivas coa protección do ecosistema.

Este espazo forma parte dun sistema fluvial que sobresa pola calidade ambiental e a riqueza natural da zona, especialmente pola súa variedade florística, entre a que destaca, sobre todo, os bosques de ribeira, integrados por árbores centenarias, plantas acuáticas e outras especies protexidas e que constitúen un dos mellores ecosistemas fluviais de Europa.

Nos últimos días, institucións, organizacións ambientais e particulares dirixíronse á Consellería de Medio Ambiente e Desenvolvemento Sostible para manifestar a súa preocupación polas actividades forestais que se estaban a realizar no espazo natural Miño-Neira e que provocaban unha deterioración dos seus valores naturais e paisaxísticos. Unha vez constatada a realidade denunciada e posto de manifesto o perigo en que se atopa a conservación deste espazo natural, considérase necesario, de conformidade co disposto no artigo 25.4º da Lei 9/2001, do 21 de agosto, de conservación da natureza, aplicar, de xeito provisional, o réxime de zona especial protección dos valores naturais ao espazo natural Miño-Neira.

Polo exposto, no uso das atribucións que me confire o artigo 34.6º da Lei 1/1983, do 22 de febreiro, reguladora da Xunta e da súa Presidencia,

**DISPOÑO:**

Artigo 1º.-*Aplicación, de xeito provisional, do réxime de zona de especial protección dos valores naturais.*

1. De conformidade co disposto no número 4º do artigo 25 da Lei 9/2001, do 21 de agosto, de conservación da natureza, aplícase, provisionalmente, o réxime de zona de especial protección dos valores naturais ao espazo natural Miño-Neira.